

**ՏԽՈՒՐ ԹԱԳԱՎԵՐԸ / Հայ ժողովրդական հեքիաթներ, Հատոր VIII / Գուգարք (Լոռի), Լոռու
քարքառ (խոսվածք)**

Մի թագավեր ա ըլըմ, շատ հարուստ ա ըլըմ, րեխա չի ունենըմ, շատ տխուր ա ըլըմ:
Օրերի մի օրը էս թագավերը գնըմ ա ժողովրդի մեջ ման գալ, մի փողոցով անց կենալիս,
տենըմ ա մի տանից ծիծաղի ձեն ա գալի, մոտանըմ ա, տենըմ ա ծափ, խնդում, ուրախութիւն:
Սա համարը գրըմ ա, վեր ունում:

Վեր գալիս ա տուն, վազիրին ասըմ ա.— Գնա էս ինչ համարի տան տուրունջը կանչի:

Վազիրը գալիս ա դրան կանչըմ ա, բերըմ թագավերի կուշտը:

Թագավերը սրան ասըմ ա.— Դուք էդ ընչի՞ վրա եք տիե ուրախանըմ, վեր ամեն րուգուն ձեր
տան մոտովը անցկենալիս ուրախութենի, ծափի, ծիծաղի ձեն եմ լսըմ:

Էս մարդը ասըմ ա.— Թագավերը ապրած կենա, էս չորս հատ լավ անգին քար ունեմ, էս ու իմ
կնիկը նհանց հետ հաղ ենք անըմ, ուրախանըմ ենք:

Թագավերը զարմանըմ ա, ասըմ ա.— Ես հարուր եռեսուն անգին քար ունեմ, ամեն մինը մի
դշի ձվի չափ, ուրախանըմ չեմ, հմի դու էդ չորս հատի մհար ուրախ ե՞ս:

Էքսը թագավերը կնգա հետ նստըմ ա ու սկսըմ խաղ անիլը: Կնիկը քցըմ ա, կպնըմ ա սրա աչք
ունքն ա կապտցնըմ, սա քցըմ ա՝ կնգա աչք ունքն ա կապտցնըմ: Տենըմ ա բան չի դուրս էկավ,
թողըմ ա:

Էքսը էդ մարդին կանչըմ ու ասըմ ա.— Դու խի՞ ինձ խափեցիր:

Ասըմ ա.— Խի՞ խափեցի:

Ասըմ ա.— Բա ինչ արիր, ասեցիր. «Ես ու իմ կնիկը չորս անգին քարի հետ հաղ ենք անըմ,
ուրախանըմ»: Ես էլ իմ կնգա հետ հաղ արի, նա իմ աչք ունքը կպտացրավ, էս էլ իրանը:

Էս մարդը ծիծաղըմ ա, ասըմ ա.— Վա յ, թագավերը ապրած կենա, բա ինձ անգին քարը ո՞վ ա
տվել, էդ հու էս իմ չորս րեխին եմ անգին քար ասըմ:

Նոր թագավերը կլիսի ա ըլըմ ու ասըմ ա.— Ախպեր, դուգ էս ասըմ, դուգ, վեր նրանք անգին
քար են, դու նրանցով միշտ ուրախանըմ էս, համա էս իմոնցովը չեմ ուրախանըմ: